

Ո Ր Ո Շ ՈՒ Մ N 420/1
/վարչական տույժ նշանակելու մասին/

«22» փետրվարի 2023թ.

ք. Երևան

Հայաստանի Հանրապետության պետական եկամուտների կոմիտեի Երևանի մաքսային սպասարկման կենտրոն-մաքսատուն, վարչության պետի տեղակալ Աղասի Աղայանս, քննելով «Այ Պլաստ» ՍՊ ընկերության (ՀՎՀՀ՝ 02615157, հասցեն՝ ք. Երևան, Սարյան 20 շ., բն. 32) տնօրեն Հարութ Հակոբի Գասպարի (անձը հաստատող փաստաթուղթ՝ 000309773, հասցե՝ ՀՀ, ք. Երևան, Արաբկիր, 17 փող., շ. 25/28) նկատմամբ հարուցված մաքսային կանոնների խախտման վերաբերյալ գործը,

Պ Ա Ր Զ Ե Ց Ի

«Այ Պլաստ» ՍՊ ընկերության անվամբ թիվ 05100010/190221/0007163 ապրանքների հայտարարագրով «Մաքսային տարածքում վերամշակում» մաքսային ընթացակարգով՝ մինչև 31.12.2022 թվականը, ձևակերպվել է բեռ, սակայն սահմանված ժամկետում նշված բեռը չի արտահանվել կամ ձևակերպվել այլ մաքսային ընթացակարգով, որի արդյունքում խախտվել է հետադարձ արտահանման պարտավորությունը:

ՀՀ ՊԵԿ Երևանի մաքսային սպասարկման կենտրոն-մաքսատուն, վարչության ՓՀ և ԳՀ բաժնի գլխավոր մաքսային տեսուչի կողմից 07.02.2023 թվականին «Այ Պլաստ» ՍՊ ընկերության տնօրեն Հարութ Հակոբի Գասպարի նկատմամբ կազմվել է մաքսային կանոնների խախտման վերաբերյալ արձանագրություն՝ ՀՀ մաքսային կարգավորման մասին օրենքի 310-րդ հոդվածի հատկանիշներով:

Մաքսային կանոնների խախտման վերաբերյալ գործի քննությունը նշանակվել է 22.02.2023 թվականին ժամը 12:00-ին, ինչի անցակացման վայրի և ժամանակի մասին պատշաճ կարգով ծանուցվել է Հարութ Հակոբի Գասպարը, սակայն չի ներկայացել գործի քննությանը: Գործի քննությունն իրականացվել է վերջինիս բացակայությամբ:

ԵԱՏՄ մաքսային օրենսգրքի 163-րդ հոդվածի 1-ին մասի համաձայն՝ «Մաքսային տարածքում վերամշակում» մաքսային ընթացակարգն օտարերկրյա ապրանքների առնչությամբ կիրառելի մաքսային ընթացակարգ է, որին համապատասխան՝ Միության մաքսային տարածքում այդպիսի ապրանքների հետ կատարվում են վերամշակման գործողություններ՝ դրանց վերամշակման արդյունքներ ստանալու նպատակով, որոնք նախատեսված են Միության մաքսային տարածքից հետագա արտահանման համար՝ առանց այդպիսի օտարերկրյա ապրանքների առնչությամբ ներմուծման մաքսատուրքերի, հարկերի, հատուկ, հակազնազցման, փոխհատուցման տուրքերի վճարման՝ պահպանելով այդ մաքսային ընթացակարգով ապրանքների ձևակերպման և դրանց օգտագործման պայմանները՝ այդ մաքսային ընթացակարգին համապատասխան:

Նույն օրենսգրքի 164-րդ հոդվածի 2-րդ մասի 1-ին կետի համաձայն՝ «Մաքսային տարածքում վերամշակում» մաքսային ընթացակարգին համապատասխան ապրանքների օգտագործման պայմաններից է «Մաքսային տարածքում վերամշակում» մաքսային ընթացակարգի գործողության սահմանված ժամկետը պահպանելը:

ՀՀ մաքսային կարգավորման մասին օրենքի 301-րդ հոդվածի 1-ին մասի համաձայն՝ մաքսային կանոնների խախտում է համարվում անձի կատարած անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության պետական սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենքով նախատեսված է պատասխանատվություն:

Նույն հոդվածի 2-րդ մասի համաձայն՝ Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային կարգավորման մասին օրենքի 310-րդ հոդվածի 1-ին մասի համաձայն՝ հետագա արտահանման պարտավորությամբ Հայաստանի Հանրապետություն ներմուծված ապրանքները կամ տրանսպորտային միջոցները սահմանված ժամկետում չարտահանելը՝ առաջացնում է տուգանք՝ խախտման օրվա դրությամբ այդ ապրանքների կամ տրանսպորտային միջոցների համար «Բացթողում՝ ներքին սպառման համար» մաքսային ընթացակարգով նախատեսված մաքսային վճարների, մաքսային մարմինների կողմից գանձվող այլ հարկերի, տուրքերի և վճարների (բացառությամբ մաքսային մարմինների կողմից մաքսային գործառնությունների իրականացման համար գանձվող պետական տուրքի) մեծության **քսան տոկոսի չափով, բայց ոչ պակաս, քան հիսուն հազար** դրամի չափով:

«Այ Պլաստ» ՍՊ ընկերության անվամբ թիվ 05100010/190221/0007163 ապրանքների հայտարարագրով հայտարարագրված բեռը «Ներքին սպառման համար բացթողում» մաքսային ընթացակարգով հայտարարագրելու դեպքում կառաջանա մաքսային վճարներ ընդհանուր 1,353,671 ՀՀ դրամ չափով (հիմք՝ զեկուցագիր թիվ Ն/20-1/23052-2023 առ 15.02.2023թ.):

Այսպիսով, վարույթի նյութերով հիմնավորվում է, որ «Այ Պլաստ» ՍՊ ընկերության տնօրեն Հարութ Հակոբի Գասպարը սահմանված ժամկետում չի ապահովել թիվ 05100010/190221/0007163 ապրանքների հայտարարագրով «Մաքսային տարածքում վերամշակում» մաքսային ընթացակարգով հայտարարագրված բեռի արտահանումը, ինչով պայմանավորված՝ թույլ է տվել ՀՀ մաքսային կարգավորման մասին օրենքի 310-րդ 1-ին մասով նախատեսված մաքսային կանոնների խախտում:


Ելնելով վերոգրյալից և ղեկավարվելով ՀՀ մաքսային կարգավորման մասին օրենքի 310-րդ հոդվածով և Վարչական իրավախախտումների վերաբերյալ ՀՀ օրենսգրքի 214-րդ, 234-րդ հոդվածներով՝

Ո Ր Ո Շ Ե Ց Ի

1. ՀՀ մաքսային կարգավորման մասին օրենքի 310-րդ 1-ին մասով նախատեսված մաքսային կանոնների խախտում կատարելու համար «Այ Պլաստ» ՍՊ ընկերության տնօրեն Հարութ Հակոբի Գասպարին ենթարկել վարչական պատասխանատվության՝ տուգանելով **270,734 ՀՀ դրամ**:

2. Որոշման մասին հայտնել «Այ Պլաստ» ՍՊ ընկերության տնօրեն Հարութ Հակոբի Գասպարին՝ պարզաբանելով, որ ՀՀ մաքսային կարգավորման մասին օրենքի 334-րդ հոդվածի 2-րդ մասի համաձայն որոշումն ուժի մեջ է մտնում այն կայացնելու պահից և համաձայն ՀՀ մաքսային ծառայության մասին օրենքի 37-րդ հոդվածի՝ որոշումը կարող է բողոքարկվել վերադաս մաքսային մարմին (պաշտոնատար անձին) կայացնելուց հետո երկամսյա ժամկետում կամ ՀՀ վարչական դատարան՝ ՀՀ վարչական դատավարության օրենսգրքով սահմանված կարգով՝ երկամսյա ժամկետում:
3. Որոշմամբ նշանակված տուգանքի վճարման հաշվեհամարն է **900005024055-ը** (**ՀՀ պետական բյուջե, կենտրոնական գանձապետարան, Երևանի մաքսային սպասարկման կենտրոն-մաքսատուն, վարչություն, ԿՈԴ 27**):

ԵՐԵՎԱՆԻ ՄԱՔՍԱՅԻՆ ՍՊԱՍԱՐԿՄԱՆ
ԿԵՆՏՐՈՆ-ՄԱՔՍԱՏՈՒՆ, ՎԱՐՉՈՒԹՅԱՆ
ՊԵՏԻ ՏԵՂԱԿԱԼ


ԱՐԱՍԻ ԱՂԱՅԱՆ